



Sesida dals

18 d'october 2021

Communitgà ils

22 d'october 2021

Protocol nr.

908/2021

Incumbensa da la fracziun da l'Allianza dal Center

concernent las consequenzas da la preschientscha d'animals da rapina gronds per
l'agricultura

Resposta da la Regenza

La Regenza parta il giudicament da las consequenzas da la preschientscha d'animals da rapina gronds en il Grischun en la dimensiun actuala, che vegn descrit en l'incumbensa. En il Grischun s'augmenta il dumber da lufs mintga onn. Vitiers vegn il cumportament problematic dals animals da rapina, damai ch'els perdan – pervia da lur status da protecziun – lur timiditad natirala envers ils umans, envers las instituziuns ed envers las infrastructuras da l'uman. Ultra da quai emprendan els pli e pli da guntgir las mesiras per la protecziun da muntaneras. Senza intervenziuns vegn quest cumportament problematic dà vinavant da generaziun a generaziun. En vista a questa situaziun n'è la protecziun da muntaneras betg pli efficazia, e las prescripziuns legalas en il sector dal management e da la regulaziun da lufs impedeschan da cumbatter en moda adattada cunter questa problematica e da la tractar conform a la situaziun. Quai periclitescha pli e pli la prontezza per ina coesistenza tranter la protecziun da las spezias/luf sco er l'agricultura, il turissem e la societad.

La Regenza sco er ils departaments ed ils uffizis pertutgads che collavuran stretgmain in cun l'auter, enconuschan la situaziun efectiva. Plinavant tgira il chantun in barat frequent cun las puras ed ils purs, cun la branscha e cun ulteriuras acturas ed acturs. Ultra da quai è vegnida nominada per quest intent ina Cumissiun spezialisada per animals da rapina gronds da l'Uniun purila grischuna, da la quala fan part er represchentanzas dal chantun.

La Regenza s'engascha cun perseveranza tar la Confederaziun per in management da lufs adattà cun cleras finamiras e per pussaivladads da regulaziun correspundentas (er preventivas). Dal rest è ella decididamain da l'opiniun, ch'i fissan pussaivlas ulteriuras mesiras er en il rom da la Lescha federala vertenta davart la chatscha e la protecziun dals mamifers e dals utschels selvadis (LChP; CS 922.0) e ch'il spazi d'agir da vart da la Confederaziun, che vegn fixà en l'Ordinaziun davart la chatscha e la protecziun dals mamifers e dals utschels selvadis (OChP; CS 922.01), n'è betg exaurì. Tenor l'avis da la Regenza sto plinavant vegnir fatga ina nova emprova per reveder la LChP. En collavuraziun cun ils chantuns commembers da la Conferenza da las regenzas dals chantuns alpins (CRCA) accompogna e sustegna ella en moda attenta ed engaschada las stentas proponidas per adattar las basas giuridicas sin plaun federal. En connex cun la protecziun da muntaneras ha il chantun fatg ils sforzs maximals. Ulteriuras mesiras per proteger las muntaneras n'èn ni supportablas ni cunvegnentas.

In'enquista en ils manaschis d'agricultura e d'alpegiada na gida strusch a meglierar la situaziun descritta. Tuttina poi esser d'interess da sclerir la situaziun dals singuls manaschis d'agricultura e d'alpegiada pertutgads directamain en connex cun la preschientscha d'animals da rapina gronds. Quai en spezial per documentar cun fatgs la midada da l'utilisaziun da manaschis d'alpegiada.

La Regenza è pia pronta da realisar in'enquista e d'incumbensar ina interpresa spezialisada externa per preschentar al Cussegl grond ed a la publicidad ina survista da las respostas a las dumondas drizzadas als manaschis da chasa e d'alpegiada.

Sa basond sin questas explicaziuns propona la Regenza al Cussegl grond d'acceptar questa incumbensa.



En num da la Regenza

Il president:

Dr. Mario Cavigelli

Il chancelier:

Daniel Spadin